



Progjet promovût di 'Il Friuli' e 'ARLeF'

## LIS AVENTURIS DI VIGJI E...

### CJÂR DIARI,

îr, Daria e la sô amiute si son cjatadis par viodi un documentari su la Gnot dai muarts in Friûl. O jeri distirât sot de stue e no ai podût fâ di mancûl di viodilu ancje jo. Ce robis stranis che a fasin i oms: di ce che o ai capît, in chê Gnot a pensavin che i muarts a lessin ator pai paîs e ator pes cjasis, e cussì i parincj a lassavin parecjât par chei che no jerin plui. A lassavin un toc di polente cuiçade, pan o alc di mangjâ su la taule o sui barcons. Po dopo, a metevin seglots o **cjaldîrs**


**CJALDÎRS**  
RECIPIENTS  
TARONTS DI  
RAM CHE A  
COVENTAVIN  
PAR CONSERVÂ  
LA AGHE

plens di aghe ator pes cjasis o intes stalis, par permeti ai muarts di bevi. Us parial normâl? Cumò che o pensi, però, cuasi cuasi, o podarès lassâ ancje jo, fûr de cjasute colôr narançon, un biel grumut di crochetis. Magari, ca di cinc dîs, ancje gno nono bis Vigji dai Zeis al tornarà a cjatâmi e, za che o soi, i lassi uns dîs scudielonis plenis di aghe. Pensistu che a puedin bastâi? Dal sigûr, daspò di tancj agns, al varà cuissà trope sêt! Ti saludi,  
Vigji



## > Tant par ridi

Un amî i dîs a di chel altri "O ai pensât cemût vistîmi pe fieste di Halloween che tu fasaràs ca di cinc dîs: se no tu mi viodis, al è dome par vie che mi soi vistût di fantasime!"



## IL CJANTON DE MUSICHE

### LA GNOT DAI MUARTS

*Si spietin tes cjasis, ta cheste gnot stuarde, frutins mascarâts che a tuchin te puarte, striis, fantasimis, ti puartin dolçuts o pûr, se tu vuelis, ti fasin scherçuts.*

*In ogni cjasute une coce ben spelade par cheste gran gnot che e somee un pôc striade, e je une cjandele propite dentri, plantade ben tal centri.*

*Rit. Halloween Halloween! ancje nô in Friûl lu vin, ma in Friûl o sin plui fuarts, le clamìn la Gnot dai Muarts.*

Piçule cerce de cjançon "La Gnot dai Muarts" O podès scoltâle dute te pontade di Maman! di cheste setemane.

(Peraulis di Daria Miani; musiche di Flaviano Miani)



## LAVORUT

## LU SAVEVISO CHE...?

■ Une volte, te Gnot dai muarts, la int e pensave che i muarts a lessin ator pai paîs. Alore, i lôr parincj ur lassavin sore de taule parecjade o sul barcon, un toc di polente cuiçade o alc di bon di mangjâ, e i cjaldîrs cun dentri la aghe di bevi.



### COCIS DI CARTONCIN

#### CE CHE US COVENTE:

- cartoncin narançon, vert e neri;
- fuarpiis gruessis;
- pinzadore;
- fil par peà lis cocis.

#### CEMÛT FÂ LA COCE DI CJARTE

- cjoli il cartoncin narançon e taiâ plui strichis gruessis e lungjis;
- meti lis strichis a raiere;
- unîlis intal pont centrâl e fissâlis cu la pinzadore (o ancje cu la cole; o pûr fâ une busute e unîlis cuntun ferme champions);
- tacâ ancje chês altris estremitâts e formâ une sfero un pôc scliçade;
- fâ cul cartoncin vert cualchi bieles fuee e tacâle su la coce;
- fâ cul cartoncin neri doi voi e une bocje di tacâ sul devant;
- peà parsore un fil o une gale par podê picjâ lis cocis ator pe cjase.



Maman! Une gnove stagjon cun tantis sorpresis! Us din apontament su



Vinars aes 5.45 sot sere

Pagjinis curadis di Daria Miani  
Consulente linguistiche de ARLeF

**ARLeF**  
AGENZIE  
REGIONÂL  
PE LENGHE  
FURLANE